

■ OR DA LA VITA DA LUDMILLA CAHENZLI

Far capuns e valurs perpetnas

En nossa famiglia èn ils capuns insatge sco in'ierta sontga. Auras famiglias posedan bischutaria ch'ellas dattan d'ina generaziun a l'otra. U chasas, chastels, mises e sulom. En nossa famiglia na datti nagut da quai. I dat persuenter capuns. Mia basatta ha mussà a mia tatta da far capuns. Lezza ha mussà a mia mamma e quella puspè a mai.

Durant manizzar il peterschigl ed il por per ils capuns savuri en cuschina. Igl è ina savur frestga che sa maschaida cun il gust salà dals langeghers e da la charnpiertg. L'odur ma regorda al temp ch'jau gidava la mamma a manizzar ervas e charn. Mia mamma raquintava lura adina co ch'ella fascheva capuns cun sia mamma.

«Nus n'avevan betg uschè buna charn da metter en la pasta. Sche tia tatta vesess tge charn ch'ins metta oz en ils capuns, sa desperass ella. Ella metteva magari en in ur rantsch da la charnpiertg. Oz na dess ins quai gnanca als pors. Capuns era ina spaisa da paupers.» Uschia raquintava mia mamma. Jau empruvava da m'imaginar co ch'ils capuns da mia tatta gustavan. Jau aveva respect dal temp dals capuns cun charn rantscha.

Oz sun jau la mamma. Mias figlias gidan a manizzar ed jau raquint da pli

baud. «Sche jau gidava a manizzar, stueva il peterschigl esser milli giadas pli fin che

quai che nus manizzain oz. Er ils quadrins da charnpiertg stuevan esser pli


manidels. Sch'els n'eran betg pitschens avunda, fascheva mia mamma sfratgs ed

jau stueva anc ina giada tagliar permez mintga tochin.» Mias figlias crain tut – era sch'igl è uschè surfatg ch'igl è strusch pli vair. Jau di: «Sche vossa tatta vesess che nus manizzain schizunt timian e salvgia en ils capuns, sa desperass ella. Vus na dastgais mai raquintar quai ad ella uschiglio survegn ella in'attatga!» Mias figlias fan egl gross.

Durant brassar giu ils capuns sun jau suletta. Mes patratgs sgulan en la cuschina da mia mamma e tar mia tatta che na zugliava betg ils capuns, mabain laschava buglir els sco bizochels.

E co vegni ad esser in di en las cuschinas da mias figlias? Tge ingredienzas vegnan ellas a manizzar en ils capuns e tge istorgias vegnan ellas a raquintar da mai a lur matras? Probabel ballas tut che schloppa.

Ma quai n'emporta nagut. Basta ch'i dat capuns. Basta ch'i dat istorgias da mammas, tattas e basattas. Basta ch'i dat valurs perpetnas.



Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria